

## মনটা পোড়ে যতো, মনটাকে পোড়াই ততো

আল নোমান শামীম

(লরেন্স ব্যারেল এর মিত্রপক্ষের কবিতা)

শোনো মেয়ে, তোমাকে বলছি-  
এই যে তুমি, তোমাকে দেখলেই  
লিওনার্দো-দ্য-ভিঞ্চি হাতে তুলে নেয় রঙতুলি,  
এই যে তুমি, তোমার হাত ধরলেই  
উদার আকাশ মেলে দেয় প্রাণবন্ত রামধনু,  
এই যে তুমি, তোমাকে স্পর্শ করলেই  
জীবনটাকে ভীষণ রকম তুচ্ছ মনে হয়-  
সেই তুমি,  
শোনো মেয়ে, তোমাকে কিভাবে বলি,  
এই যে সাক্ষ্য-বাসর ভেঙ্গে প্রদীপের  
আলোর ক্লাস্ত সহমরণ,  
অতঃপর-  
তোমার প্রেমে নিঝুম কাঁটি বসন্ত  
আর সখের এই বেদুঈন  
তোমার ছোট্ট তাঁবুতে হৃদয়ের ঝলকানি-  
তুমি বললে বিষন্ন কাতরতায়,  
আর কেন লিখোনা কবিতা!  
আমায় কবিতা এঁকে দাও-  
কি বলবো তোমায় মেয়ে,  
তোমাতে বসবাস আমার-  
আদ্যোপান্ত কবিতায় বসবাস  
কি করে লিখি তোমার চেয়ে প্রাণবন্ত কবিতা!



কবির কবিতা লিখে প্রেমের পড়ার আগে, অথবা  
প্রেমের পরে, তাকে লিখতে হয়  
বিরহ আর কষ্টের জারী-সারি-ভাটিয়ালী-  
প্রাচীন বর্ষার জলে, বিছানায় কাঁথামুড়ে  
তাকে লিখতে হয় কষ্টের অনন্ত ঝালর ।  
তুমি ভুল বুঝো না মেয়ে,  
আমি স্বার্থপর নই, কবির কেবল শব্দের  
কাছেই স্বার্থপর,  
বিশ্বাস না হয়-  
গুরুদেব অথবা কাজীদা,  
নিতান্ত শামসুর অথবা নির্মলেন্দু-  
জিগগেস করো-  
দেখবে, তারা সবাই বলবে, কবির  
প্রেমিক কিংবা প্রেমিকা নয়-  
প্রেমের কাছে দায়বদ্ধ, আমাকে  
তুমি ভুল বুঝো না মেয়ে,  
ভুল বুঝো না ।